



## KENYATAAN AKHBAR MENTERI KESIHATAN MALAYSIA

### SEMPENA SAMBUTAN HARI DENGGI ASEAN PERINGKAT KEBANGSAAN 2014

Penyebaran Penyakit Demam Denggi boleh berlaku dengan pantas ke seluruh pelosok dunia tanpa mengira batas sempadan sesebuah negara. Menurut Pertubuhan Kesihatan Sedunia (WHO), benua Asia Pasifik termasuk Negara-negara Asean adalah menyumbang kepada 75% beban penyakit demam denggi secara keseluruhannya.

Menyedari bahawa masalah denggi bukan sahaja merupakan masalah kesihatan tetapi juga boleh menjadikan pembangunan sosio-ekonomi negara serantau, maka Pertubuhan Negara-Negara ASEAN telah mengambil pendekatan bersepada untuk menangani masalah ini melalui **Sambutan Hari Denggi ASEAN**. Ianya bertujuan untuk meningkatkan kolaborasi dan tindakan bersepada pelbagai lapisan masyarakat, sektor kerajaan dan swasta serta agensi-agensi lain dalam membanteras denggi.

Sambutan Hari Denggi Asean ini telah ditetapkan pada 15 Jun setiap tahun dan buat julung kalinya telah diadakan di Jakarta, Indonesia pada **15 Jun 2011**. Tahun 2014 adalah merupakan tahun ke 4 bagi Sambutan Hari Denggi Asean ini, yang mana pada peringkat Asean ianya diadakan di Angeles City, Pampanga, Filipina. Tema sambutan pada tahun ini

adalah “Perpaduan Dan Harmoni Dalam Kalangan Komuniti Asean: Kunci Utama Dalam Memerangi Denggi”.

Pada tahun ini, negeri Melaka telah dipilih sebagai tuan rumah bagi menjayakan ‘Sambutan Hari Denggi ASEAN Peringkat Kebangsaan 2014’. Sambutan yang diadakan di Dataran Sungai Melaka ini juga adalah merupakan salah satu agenda Festival Antarabangsa Sungai Melaka. Sambutan Hari Denggi ASEAN ini menunjukkan kerajaan melalui Kementerian Kesihatan sentiasa komited untuk terus memerangi denggi dengan bantuan dan kerjasama semua pihak agar dapat mewujudkan **Komuniti Bebas Denggi**.

Untuk menangani masalah demam denggi, Kementerian Kesihatan telah melakukan pelbagai usaha, namun daripada pemantauan yang dilakukan oleh Kementerian Kesihatan, peningkatan kes denggi masih lagi berlaku. Dari bulan Januari hingga 7 Jun 2014, sejumlah 38,411 kes Demam Denggi dengan 75 kematian telah dilaporkan di seluruh negara berbanding 10,910 kes dengan 22 kematian dalam tempoh yang sama tahun 2013. Jumlah ini menunjukkan peningkatan kes sebanyak 252% dan kematian sebanyak 241%.

Sehubungan itu, kerajaan melalui KKM amat serius dalam usaha membanteras masalah denggi. Bantuan dan kerjasama terutamanya daripada masyarakat setempat, lain-lain agensi kerajaan, syarikat swasta dan badan-badan bukan kerajaan amatlah penting bagi menjayakan agenda pencegahan Demam Denggi.

Penglibatan masyarakat dapat dipertingkatkan melalui penubuhan pasukan COMBI yang akan memastikan aktiviti cari dan musnah tempat-tempat pembiakan Aedes dapat dilaksanakan dengan lebih cepat, konsisten dan berkesan. Sehingga kini terdapat sebanyak 2,670 pasukan COMBI di seluruh negara yang digerakkan oleh masyarakat melalui pertubuhan Kawasan Rukun Tetangga (KRT), Jawatankuasa Keselamatan dan Kemajuan Kampung (JKKK), Jabatan Kemajuan Masyarakat (KEMAS), persatuan penduduk setempat dan NGO. Manakala di negeri Melaka pula, sebanyak 86 pasukan COMBI telah ditubuhkan dalam usaha membendung kejadian Demam Denggi.

Selain itu, kerjasama agensi kerajaan dan juga swasta dalam pencegahan denggi amatlah digalakkan. Dalam perkara ini, KKM amat menghargai sumbangan yang diberikan oleh agensi-agensi berkenaan sama ada dari segi kewangan, bahan-bahan promosi kesihatan, penubuhan Denggi Patrol dalam kalangan pelajar sekolah dan sebagainya.

Akhir kata, Kementerian Kesihatan menyeru agar setiap warga Malaysia tanpa mengira kaum, agama dan juga latar belakang memberikan komitmen dan kerjasama padu dalam membantu dan menyokong usaha murni kerajaan menangani masalah denggi di negara ini. Ini supaya rakyat negara ini dapat menikmati tahap kehidupan yang berkualiti dan sihat sepanjang hayat serta bebas dari gigitan nyamuk Aedes. Tanpa kerjasama masyarakat, hasrat ini sukar untuk dicapai.

**YB DATUK SERI DR. S. SUBRAMANIAM  
MENTERI KESIHATAN MALAYSIA**

14 JUN 2014